

KERWEREDD 1998

Die Zeit der Enthaltbarkeit is endlich vorbei,
mer hann e Fescht im Derf - jetzt geht's los met de feierei.

Drum griß ich Eich all - ehr lieue Leit,
unser Kerb is do - es werd grad schunn werrer Zeit!

Wie jed Johr hann mer uns zusamme gefunn
un hann Eich denne schöne, dicke, große, lange Strauß gebunn.

De Umzug war werrer suppä, Klasse eins A,
der werd glaab näkschd Johr live uff Premiere iwvertraa.

Un fer Eich do unne werds aa glei schään,
wenn ich die vorläs - die wo do in meine Akte stehn.

Doch bevor ich Eich das alles verzehle,
dud die Musik emol ehr Instrumente quäle!

Dominik - Schultasche

In de Elisabeth-Matz-Stroß, moins um halb siwwe,
- Ihr wisse jo - das iss die Gass do iwwe,

Do schleicht jo grad auscm duschtre Tann
E dunkli Gestalt de Weg entlang.

Uff'em Weg zum Bahnhuf er sich befind,
ä Au' uff, es anner noch blind.

Sei Ziel dut immer näher ricke,
awwer - oh Schreck - was muß er do erbligge !?

Er hat im morjentliche Streß
doch glatt sei Schuldach dehäm vergeß !

Was soll er jetzt bloß mache?
Wie wern die Schulkamerade lache!

Awwer sogleich hat er sich geschickt
un bei Veldens de Klingelknopp gedrückt.

“Gemoie”, saat er, “derft ich mol eier Telefon benutze?”
Die Oma dut jo doch mo stutze,

hat ihm awwer doch es Telefon gezeichnet
un er hat dehäm sogar jemand erreicht.

“Mama”, jault er, “bring mer mei Dasch !
Un das Ganze ziemlich rasch!”

Es Ute hat sich ins Auto geschwung
un hat seim Bu de Rucksack brung.

Mer mecht's net glaawe, wemmer's net sieht,
awwer de Dominik hat doch tatsächlich seine Zuch noch kriet!

Basko – Rinderjagd

Vorsjohr, do hogge mer beim Martin uff'em Dach,
mer hotte geschafft un jeder hott sei Sach.

Mer gugge in die Runde un genieesse de Ausblick,
de änt odder anner nemmt noch e paar Schlick.

Uff emol, was siehn unser verquollene Aue,
do duht doch e Stick Vieh vorme Hund abhaue.

Das Vieh, das muht -- der Hund, der bellt,
als wärn die ganz alä uff de Welt.

Nur her mer noch was im Hinnergrund,
sowas wie "Basko, du dummer Hund!"

Jetzd endlich dumers registrere,
das sinn net nur die Viecher, die mer here.

Do hubst noch ens iwwer de Zaun,
- mer traue unsre Aue kaum -

wie e Gazell springst do driwwer,
dem Hund enoh, eriwwer uu eniwwer,

es iss werklich e Bild fer die Götter,
do verstumme doch alle Spötter:

Unser Metzjer, der wäß wie mer's macht,
der schickt Hund un Fraa all uff die Jachd,

damit die es frische Fläsch schunn heit besorje
un net erscht fer die Bestellung vunn morje.

Eugenzeche

Die Maulwurfsplaach in Nerremohr
nimmt Ausmaße an, wie nie zuvor!

E riesicher Bau hat mer do entdeckt,
allerdings war der noch ganz vedreckt.

Denne Maulwurf gebbt's a nirmie uff dere Welt,
awwer unser Bollemeschder riecht schunn es große Geld.

De ganze Dreck wird rausgeschärft
un wer denkt, das war alles, der hat sich grad geschnärft!

Tourismus ankurwele hääßt das Zauberwort,
in fünf Johr kennt jeder unsre Ort !

Gruwehelme, Daschelambe leie schunn ball uff de Fels bereit
fer die veele, erwardete Leit!

E Schnapsbrennerei un e neies Hodell
Gebt's dann a noch ziemlich schnell.

Die Eugenzeche iss die Attraktion,
das wäß de Wolf a heute schon!

Awwer bisses so weit kommt - kammer noch hoffe un denke,
daß Gott gnädisch is un dudem noch e bissje Weisheit schenke !

Dominik – Worschdsuppausfahre

Ach, de Dominik, was soll ich saan,
der arm Kerl iss schunn widder dran!

Worschtsupp ausfahre iss e schöner Brauch
un es Saufe dodebei auch.

Mer wannert stets vunn Haus zu Haus
un jeder gebbt e Schnäpsje aus.

Owens dann, ganz ohne Witze,
hat jeder ganz schä enner sitze.

Zum Abschluß uffem Felsehiwwel
steht em die Brie bis an de Giwwel,
gar manchem war's dann ganz schä iwwel.

Enner - do owwe vumm Eilbacherhof
fand's uff emol ganz schä doof.

Bevor zum Telefon er find,
die Soß ihm aus'em Mund schunn rinnt.

Ruck zuck iss die ganz Thek vollgesaut
uns es Susi fascht aus de Socke haut.

“Wer bricht, der wischt!”, tönt's aus de Kich,
“Toni, loß mich jetzt net im Stich!”

Der Buh, der find trotz allem häm
un denkt: “Oje, wie ich mich schäm!”

Er fährt nie wieder mit beim Worschtsuppbringe,
dann brauch's Susi a nimmi de Butzlumbe se schwingel!

Sascha – Messeplatz

Er kenne ne joh, mem senfgelwe Blitz,
der klemmt sich öfters in seine Sitz,

um emol die Geschend zu erkunde,
dodebei dreht er so manche Runde.

Biet mol links un a mol rechts ab,
so manchmo iss das ganz schä knapp.

Rescht er sich dann emol e bissje uff,
do sucht er sei Heil net nur im Suff,

sonnern es geht widder ab uff Tour,
das iss fer denne wie e Kur !

Letschdens war dann Floriansdach,
das war a net so ganz sei Sach.

Also, hat er sich angeschickt,
seine Autoschlüssel gezickt,

mitem Kollech sich samrne in die Schissel gesetzt
un iss dodemit Richtung Lautre gefetzt.

Uff de Kerb wollt er mol Dampf ablosse
- un hinner sich losse - die Provinzgenosse.

De Messeplatz, denne hanse gesucht,
die Kerb war fer denne Owend schunn gebucht.

Doch, wie's halt so iss,
mit denne iwwereifriche Entschliss:
De Wille war do, de Reschd net so ganz,

sie fahrn efach mo de Nas noh unn hann gedenkt, sie hann's.

Quer durch Lautre sinnse gegurkt,
hann no alle Egge un Ende geguckt.

Doch samer's metem änziche Satz:
Gefunn hann'se alles, nur net de Messeplatz.

Endlich in Mehlinge ankumm,
hann'se ingesieh ihre Irrtum.

Gewennt hann'se, sinn zuriggefah — würd die Opel öfters ihr Firma
verlege,
dann dät sich de Sascha a auskenne, abseits vunn denne Wege.

Dyck – Poolparty

Bei Vater-Sohn-Parties - das iss bekannt,
erlebt mer immer allerhand.

Mit Bier vunn inne naß gemach,
war das vunn auße jetzt e schänie Sach,

hat sich de Jürgen so gedenkt,
un hat sei Gang in Richtung Pool gelenkt.

De Schucki hat er glei mitgenumm
un dann sinnse mol e paar Runde geschwumm.

Poolparty iss immer e Event,
denkt sich so mancher, der die Gaschdgeber noch net so gut kennt.

Un wer net freiwillig sprang, der iss gefloh,
bei solche Feschde iss das halt so.

Vor paar Daa, nachts um halb zwölf iss es schunn kalt,
was soll mer mache — do bibbert un bebbert mer halt.

Jürgens Kläderschrank plündere - voller Haschd,
a wenn manches net so gut baßt.

Bald ware alle widder trogge
vum Scheitel bis zu de Sogge,

Die Party, die ging munter weiter,
un alle waren widder heider.

Ende war dann kurz vor vier,
denn zur Neige gings mem Bier.

Uff emol warn se alle weg, bis auf zwei,
do war die Party halt vorbei.

Trogge sinnse, un dehäm,
ach, wie war die Party schön!

Lissje un de Hammermann

Heit isses schä warm - awwer vorm halwe Johr do hat die Kält noch geknärrt,
das war so e rischdischer Fraewinter – “lang un hart”.

Das is e unangenehmie Zeit - do werd merjo net gär eninn gebor,
awwer so issem halt gang, unserm blondgelockte Mädchen, desjohr im Januar vor fuffzisch Johr.

Die Organisation fer das Ereignis is Monate vorher schunn uff häse Toure geloff,
denn bei so Feschtscher werd net nur geß un gesoff!

Fers Au‘ muß was her, mer will so zu saan - ach optische Reize
un so manche hat gewißt, wer dodemit net dut geize !

Uff de Party is mer mittlerweile vum schungele zum danze iwwegang,
do hot plötzlich e ganz unbekannter Kerl midde in de Gesellschaft drinngestann.

Der hat sich gewunn un gedreht - lauder solche Sache –
so als wollt er was in sei knappe Hosse ninn mache.

Die Aue väärollt - er fangt o se stehne,
mer hott de Indruck, er hätt met de Verdauung geherische Probleme.

Die Männer hanns net kabiert, awwer de Fraue - besonnertscht im Lissje - duts mächtisch gefalle,
der Typ merkt das un loßt zuletscht ach alle Hülle falle.

So wie der kä Fetze Stoff mä uff seim Leibsche trägt,
em Heike es doch glatt die Sprach verschlägt.

Es wollt doch nur e bisje Gaudi fer sei Nohbärin hann,
do hat der Kerl pudelnaggisch vor alle Leit gestann.

Des war e Geplärrs - des Gejole hann ich heit noch in meim Ohr,
awwer Lissje so e Geschänk gebts nur beim Geburtsdach fer fuffzisch Johr.

Das war mei Red - ehr liewe Leit,
ich hoff Eich hat's e bisje gefreit.

Ich kennt Eich jo noch me verzehle,
awwer wenn ich do runner guck, sieh ich e haufe trockene Kehle !

Hoffentlich sinn mer die Leit net bees,
die ich grad do jowwe hann vorgeläs.

Näkschd Johr sinn werre annere drann
un fer die wermer a e paar Geschichtscher hann.

Doch bevor ehr jetzt glei widder so derchenonner rum laafe,
wolle mer noch unsere schöne Kerwestrauß andächtig daafe:

“DU SOLLSCHT ES GANZE JOHR IWWER HENKE,
DAß MER NOCH LANG AN UNSER KERB SERICK DENKE !”

“Straußbuwe, wem is die Kerb ?”

So jetzt mach ich Schluß - un weil mer hann so veel geplärrt,
hoff ich uff e großer Applaus, fer de Helmut, die Musik, die Straußjugend, fer mich un unsre
Wert!